

# Tymor yr Hydref

## Adeiladau

---

---

**Cysyniadau:** Gwrando, gosod esiampl, penderfyniad, ymddiriedaeth.

**Amcan:** Dangos pa mor bwysig ydi gosod sylfaen gadarn i'n bywyd.

**Cyfarpar:** Lluniau o wahanol adeiladau.

### Cyflwyniad:

● Holi'r plant am wahanol adeiladau yn eu hardal.

Tai, ysgol, llyfrgell, meddygfa, ysbyty, banciau, fflatiau, siopau, eglwysi, capeli, mosg, synagog.

● Beth ydi pwrpas yr adeiladau hyn?

Adeiladau i fyw ynddyn nhw, adeiladau i ddysgu, adeiladau i'n gwella pan fyddwn yn sâl, adeiladau i gael bwyd, adeiladau i gael arian, adeiladau i addoli.

● Holi'r plant i ba adeiladau y byddan nhw'n mynd?

● Sut adeiladau ydyn nhw?

Disgrifio'r adeilad – y to, y waliau allanol, y drysau a'r ffenestri.

Yna disgrifio'r tu mewn, e.e. y llyfrgell yn llawn o lyfrau, yr archfarchnad yn llawn o fwydydd.

● Disgrifio'r neuadd neu'r ystafell ddosbarth – cyfeirio at bensaernïaeth yr ystafell: y nenfwd, ydi o'n isel; y waliau, pa mor drwchus; y ffenestri,

ai gwydr dwbl, ffenestri bach neu fawr? Faint o ddrysau?  
Oes modd gwella ar bensaerniaeth yr ystafell?  
Mwy o ffenestri, gostwng y nenfwd, mwy nag un drws?

● Beth ydi'r rhan bwysicaf o'r adeilad? Y to, y waliau?  
Na, mae'r rhan bwysicaf o'r golwg. Dyma'r sylfaen.

● Mae'r adeilad i gyd wedi'i adeiladu ar sylfaen gadarn.  
Dyma sy'n gwneud yr adeilad yn ddiogel.

### **Trafodaeth bellach:**

● Fel y mae pob adeilad angen sylfeini cadarn mae angen sylfaen gadarn ar gyfer ein bywyd.

● Beth fyddai'n sylfaen dda i'n bywyd ni?

● Beth am ddysgu caru a derbyn pawb?  
Ac o garu pawb yna mae'n rhaid eu helpu. Dim ots pwy ydyn nhw.

### **Stori:**

*Dywedodd Iesu stori wrth ei ffrindiau am ddau dŷ.*

*Wrth i'r bobl wrando ar eiriau Iesu, roedden nhw'n rhannu'n ddau grŵp. Roedd rhai'n awyddus iawn i glywed mwy, ac am wybod sut i ufuddhau i Dduw. Roedd eraill yn amheus, a hyd yn oed yn ddig wrth wrando arno'n dysgu. Roedd ei ddull o ddysgu mor wahanol i ffordd y bobl grefyddol, y Phariseaid. Felly dyma Iesu'n dweud stori wrthyn nhw.*

*'Os byddwch yn gwranddo ac yn gwneud popeth rwy'n ei ddweud wrthoch chi, yna byddwch yn debyg i ddyn doeth a adeiladodd dŷ ar y graig. Cyn iddo ddechrau adeiladu, gwnaeth yn siŵr fod y tŷ wedi'i osod ar sylfeini cadarn. Pan ddechreuodd y glaw guro, a'r gwynt hyrddio o gwmpas, wnaeth y tŷ ddim syrthio. Arhosodd y tŷ'n solet a chadarn.*

*'Ond os na fyddwch chi'n cymryd sylw, ac yn gwrthod gwranddo, byddwch yn debyg i ddyn ffôl a gododd ei dŷ ar dywod. Pan oedd y*

*gwynt yn hyrddio, a'r glaw yn pistyllio, syrthiodd y tŷ am nad oedd y sylfeini'n ddigon cadarn. Dymchwelodd y muriau, y to a'r drws a chollwyd popeth.*

*'Peidiwch â bod fel y dyn ffôl, yn edifar pan fydd yn rhy hwyr i newid pethau. Byddwch fel y dyn doeth; gwrandewch yn ofalus ac ewch ati i ddilyn fy nghyfarwyddiadau.'*

Beibl Lliw Stori Duw tt. 233–234

### **Trafodaeth bellach:**

- Pam na ddymchwelodd y tŷ a adeiladwyd ar y graig?
- Beth ddigwyddodd i'r tŷ a adeiladwyd ar y tywod?
- Pa un o'r dynion oedd wedi gwrandao ar neges Iesu?

### **Dyfyniad o'r Beibl:**

Am hynny, calonogwch eich gilydd, ac adeiladwch bob un ei gilydd.

1 Thesalonaiad 5:11 BCND

### **Emyn: Y dyn adeiladodd: Canu Clod 416**

#### **Munud i feddwl:**

Addysg ydi'r sylfaen i baratoi ar gyfer y dyfodol.

#### **Myfyrdod/Gweddi:**

Dowch i ni feddwl am y rhai rydyn ni'n eu caru.

Rhieni, brodyr a chwiorydd ac aelodau eraill o'r teulu.

Ffrindiau ac athrawon yn yr ysgol.

Cariad ydi'r sylfaen i adeiladu ein bywydau arno. Amen.